

1588 viarum aditus intersepiunt, catenas objiciunt, munitiones tumultuario opere probe lateribus tutas, milite adjecto, excitant: nusquam, nisi a regionum urbis præfectis edito nomine, aut fide ostensa, aditus patet. Brisacius, Boisdelfinius, Sciamajus, atque alii foederis antesignani in Helvetios impetum faciunt, nonnullos obtruncant, reliqui armis prope nudati terga vertunt; ex Gallicarum cohortium numero idem alii faciunt. Repentino hoc successu mirum in modum Henricus perturbatus, irarum faces, quibus incendebatur, premere ac tegere nititur. Mater illico ad Guisium tendit, si qua forte ratione ea tempestas sedari queat. Verum res adeo processerat, ut nullatenus fisti procellæ impetus posset. Itaque regreditur, ac vix inter viarum septa rheda, qua vehebatur, ei aditus fuit. Magis magisque populo æstuante, Henrico nuntiatur, telum, ni caveat, in se casurum; per novam portam sequenti nocte duodecim circiter millia hominum urbem ingressuros; Luparæ palatium, ut ei exitum intercludant, invasuros. His nuntiis Henricus territus, pedes palatium egressus, infesso equo, cum e suis aliquot per eandem portam Lutetia egreditur, in urbem sæpius conversus, Parisiensium ingrati animi crimen exprobrans, qui alias, supra quam dici posset, a se eveci, modo se deprimerent ac deferrent. Postridie Carnutum pervenit, quo multi confluerent.

*Henricus
Rex Lutetia
abscedit.*

Guisius ea occupare pergit, quæ, nullo obistente, ad se pervenerant, compluribus e suis admirantibus, quod aperte in Henricum insensus, vel nominis regii reverentia impeditus, vel conscientia territus, opportuna occasione minime usus, inani tantum terrore affecisset, cum vel in suam potestatem redigere, vel, nece illata, tollere potuisset. Aureliani præfecto, foederatisque nobilibus in Beaussa ac circumjectis regionibus commorantibus, Lutetiæ eventum significat. Ad Henricum vero literas dat: summa molestia se affectum, quod sibi ac suis diffidens Lutetia excesserit; quæ acta fuerant, populi metu Inquisitionem timentis facta: sinceræ ipsius in Regem voluntatis Reginam matrem testem afferre. Eodem tempore Carnuto Henricus provinciarum gubernatoribus quæ acciderint enuntiat: nobiles civitatesque in fide contineant, præ-

*Guisi Ducis literæ
ad Regem.*